

- प्रधानमंत्री नरेन्द्र मोदी आज परीक्षा पे चर्चा कार्यक्रम मांय विद्यार्थियां ने तनाव मुक्त रह र परीक्षा री तैयारी करण री राय दीनी।
- राष्ट्रपति द्रौपदी मुर्मु महाकुम्भ रा त्रिवेणी संगम मांय आस्था रो स्नान कीनो—कह्यो—महाकुम्भ एका अर आध्यात्मिकता रो संदेश देवे है।
- मुख्यमंत्री भजन लाल शर्मा कह्यो —सरकार किसानो रो विकास करणो तैय कीनो—मातृकुण्डिया ने धार्मिक सर्किट ऊं जोड़बा रो ऐलाण कीनो।
- जैसलमेर रा मरु महोत्सव मांय आज दूजा दिन ई रंगारंग कार्यक्रम व्ह्या।

000

प्रधानमंत्री नरेन्द्र मोदी आज परीक्षा पे चर्चा कार्यक्रम रा आठवां संस्करण मांय विद्यार्थियां सागे बातचीत कीनी। वे पूरा विकास माथे जोर देता थकां विद्यार्थियां ऊं परीक्षा रे दौरान तनाव अर चिंता माथे काबू करण रा बारा मांय बात कीनी। प्रधानमंत्री किकेट मैच री मिसाल देता थकां कह्यो के ज्यां बल्लेबाज़ दबाव री परवाह नीं कर र पूरो ध्यान गेंद माथे राखे है, वां ई भांत विद्यार्थियां ने ई परीक्षा रा दबाव ने दूर राखता थकां ध्यान पढाई मांय लगावणो चाहिजे। प्रधानमंत्री पोषण अर आरोग्य रा महत्त्व रो जिक करता थकां विद्यार्थियां ने स्वस्थ रेहवण सारु मोटा अनाज अर तरकारियां खावण री राय दीनी। प्रधानमंत्री कह्यो के नींद पोषण माथे निर्भर है।

.....  
प्रधानमंत्री विद्यार्थियां ने परीक्षा रा दबाव ऊं दूर रह र तैयारी करण अर खुद ने चुनौती देता रेहवण री राय ई दीनी। प्रदेश मांय ई प्रधानमंत्री रा परीक्षा पे चर्चा कार्यक्रम ने उमाव सागे देख्यो अर सुणी ज्यो। स्कूलां मांय प्रधानमंत्री रा ई कार्यक्रम ने बतावण अर सुणावण सारु व्यवस्थावां करी ज्यी। झालावाड रा केन्द्रीय विद्यालय मांय राख्यी ज्या कार्यक्रम मांय बच्चां खास उमाव सागे सिरकत कीनी। जालौर री स्कूलां अर मदरसां मांय ई परीक्षा पे चर्चा कार्यक्रम ने देखण सुणबा सारु विद्यार्थियां मांय उमाव निजर आयो। सागाना री सीनियर सैकण्डरी स्कूल मांय करियर मेळो लगायी ज्यो। सरहदी ज़िला बाड़मेर री न्यारी—न्यारी स्कूलां मांय ई विद्यार्थी अर शिक्षक पूरा उमाव सागे ओ कार्यक्रम सुण्यो सवाईमाधोपुर रा पीएम श्री केन्द्रीय विद्यालय री काव्या जैन बतायो के प्रधानमंत्री रा परीक्षा पे चर्चा कार्यक्रम ऊं वां सरीखा केई विद्यार्थियां मांय परीक्षा रो तनाव कम व्हे है।

.....  
पाली ज़िला रा महात्मा गांधी राजकीय विद्यालय नाडोल मांय ई विद्यार्थी प्रधानमंत्री री सलाह अर सुझाव अपनावण रो संकल्प लीनो। ई मौके स्कूल मांय करियर मेळो ई लगायी ज्यो। हनुमानगढ़ ज़िला मांय टिब्बी री महात्मा गांधी स्कूल मांय राख्यी ज्या करियर मेळा मांय विद्यार्थियां ने न्यारी—न्यारी स्टॉलां रे जरिये करियर रा बारा मांय जाणकारी दीरीजी। टिब्बी रा उपखण्ड अधिकारी सत्यनारायण सुथार बतायो के मेळा मांय खुद रा नौकरी धंधा रा बारा मांय लगायी ज्यी स्टॉल माथे खास ध्यान रह्यो।

प्रदेश रा न्यारा—न्यारा ज़िलां ऊं प्रधानमंत्री रा परीक्षा पे चर्चा कार्यक्रम ने उमाव सागे देखण अर सुणबा रा समाचार है।

000

राष्ट्रपति द्रौपदी मुर्मु आज महाकुंभ रा त्रिवेणी संगम मांय पवित्र डुबकी लगाई। वे गंगा, जमुना अर सरस्वती नदी रा संगम माथे पूजा—अर्चना कीनी। राष्ट्रपति सागे उत्तर प्रदेश री राज्यपाल आनंदीबेन पटेल अर मुख्यमंत्री योगी अदित्यनाथ ई मौजूद रहया। राष्ट्रपति सोशल मीडिया पोस्ट रे जरिये कह्यो के महाकुंभ एका अर आध्यात्मिकता रो संदेश देवे है। ई बीचे रेल मंत्री अश्विनी वैष्णव माघी पूण्य रा स्नान ऊं पैली प्रयागराज रेलवे टेशन रा प्रबंधन रो जायजो लीनो। खबरनवीसां सागे बातचीत करता थकां श्री वैष्णव कह्यो के सरकार महाकुंभ सारु शहर रा आठ रेलवे टेशनां माथे ज़रूरी प्रबंध कीना है। ई बीचे रेल मंत्रालय प्रयागराज जंक्शन ने बंद करण री मीडिया मांय चाल रही खबरां ने गलत बतायी है। मंत्रालय रे मुजब ज़िला प्रशासन रा अनुसार प्रयागराज संगम टेशन ई महीना री 14 तारीख ताँई मुसाफिरां री

आवाजाही सारू बंद रहवेला। मंत्रालय रे मुजब महाकुंभ मेला हलका रे आरे—सारे रा आठ टेशनां ऊं नियमित अर खास रेलगाडियां सुचारू रूप ऊं चाल रही है।

000

मुख्यमंत्री भजनलाल शर्मा कह्यो है के राज्य सरकार किसानां रा विकास सारू लगातार काम कर रही है। वे आज चित्तौड़गढ़ ज़िला रा मातृकुंडिया मांय राख्यी ज्या पशुपतिनाथ महादेव मंदिर प्राण प्रतिष्ठा समारोह मांय बोल रहया हा। वे कह्यो के किसानां ने बत्ती ऊं बत्ती बिजली मुहैया करावण सारू सरकार लगातार कोशिश कर रही है। वे कह्यो के नौजवानां ने नौकरी दिरावण सारू सरकार कंपनियां सागे करार कर रही है। वे कह्यो के एक लाख ऊं बत्ता नौजवानां ने नियुक्ति पत्र दे दिया ज्या है। श्री शर्मा मातृकुंडिया ने धार्मिक तौर ऊं खास बताता थकां धार्मिक सर्किट ऊं जोड़बा रो ऐलाण कीनो।

000

लोकसभा अध्यक्ष ओम बिरला संसद अर विधान मण्डलां री कार्यवाही मांय सदस्यां री कम व्हेती भागीदारी अर सियासी अड़चनां माथे चिंता जताई है। वे आज संसद भवन मांय महाराष्ट्र विधान मण्डल रा नुवा चुणी ज्या सदस्यां सारू राख्यी ज्या प्रबोधन कार्यक्रम मांय बोल रहया हा। श्री बिरला विधायकां ऊं सत्र रे दौरान सदन मांय बत्ता ऊं बत्ता बगत तांई मौजूद रहवण अर न्यारा—न्यारा पक्षां री राय सुणबा सारू कह्यो। लोकसभा अध्यक्ष विधायकां ऊं जनता रा भला ऊं जुड़या मुददा उठावण बाबत् ई कह्यो।

000

सोम, माही अर जाखम नदियां रा संगम माथे बेणेश्वर धाम मांय चाल रहया मेला मांय राजस्थान अर आरे—सारे रा राज्यां ऊं मोटी तादाद मांय जातरू पूग रहया है। म्हाणा खबरनवीस बतायो के पवित्र संगम माथे तड़के ऊं ई स्नान करण रा अर दूजा धार्मिक आयोजन राख्या जा रहया है।

.....

जैसलमेर मांय चाल रहया मरु महोत्सव रा दूजा दिन आज ई केई कार्यक्रम राख्यी ज्या। संवारे शोभा यात्रा निकाळी ज्यी अर सोनार किला माथे लक्ष्मीनाथ जी मिंदर मांय खास पूजा अर्चना करी ज्यी। म्हाणा खबरनवीस बतायो के ई दौरान जिला स्टेडियम मांय भांत—भांत रा सांस्कृतिक आयोजनां सागे सैलाणियां सारू न्यारी—न्यारी होड़ां राख्यी ज्यी।

.....

भरतपुर रा केवलादेव राष्ट्रीय पक्षी उद्यान मांय आज सारस री 42वीं गिणती सरू व्ही। उद्यान मांय सारस री गिणती सारू 17 टीमां बणायी ज्यी है। केवलादेव उद्यान सागे ई उत्तर प्रदेश री सरहद ऊं लाग्योड़ा 12 हलकां मांय ई गिणती करी जा रही है। केवलादेव नेचुरल सोसायटी रा अध्यक्ष कृष्ण कुमार बतायो के गिणती सारू केवलादेव उद्यान रा कर्मचारियां सागे नेचर गाइड, पर्यावरणविद, विद्यार्थी अर ई—रिक्शा चलावण वाळां री सेवा ई ली जा रही है।

000

जोधपुर रो तिंवरी—मथानिया हलका मांय कांदा री खेती काश्तकारां री आमदनी रो खास ज़रियो साबित व्हे रही है। हलका मांय मिर्ची री उपज पाछे अब कांदा ई खास साख बण रहया है। म्हाणा खबरनवीस बतायो के हलका रा 35 ऊं बत्ता गांवां मांय करीब 25 हजार बीघा ज़मीं मांय कांदा रोप्या जा रहया है।

.....

जलदाय मंत्री सुरेन्द्र सिंह रावत कह्यो है के सरकार पूर्वी राजस्थान नहर परियोजना—एन.आर.सी.पी. रे जरिये हर घर तांई पाणी पूगावण री कोशिश कर रही है। वे आज पाली ज़िला रा मारवाड़ जंक्शन मांय राख्यी ज्या एक सामाजिक कार्यक्रम मांय बोल रहया हा। जलदाय मंत्री कह्यो के राज्य सरकार हर एक जण तांई पाणी रो सुबीतो पूगावण सागे ई इण ने बचावण सारू ई लगातार जतन कर रही है। कार्यक्रम मांय राज्यसभा रा सदस्य अर भारतीय जनता पार्टी रा प्रदेश अध्यक्ष मदन राठौड़ सगळा धर्मा मांय पाणी बचावण री सीख रो जिक कीनो। ई मौके रावत समाज रा निर्मला पीर मठ मांय धर्म जागरण सभा राख्यी ज्यी।

000

जयपुर कने जोबनेर रा श्री कर्ण नरेंद्र कृषि विश्वविद्यालय मांय आज तीजी कुलपति चल वैज्यंती खेलकूद होड़ सर्स व्ही। 12 फरवरी तांइ चालण वाळी ई होड़ मांय विश्वविद्यालय रा 14 कृषि महाविद्यालयां, 3 कृषि अनुसंधान केंद्रां, 4 कृषि अनुसंधान उप केंद्रां, 8 कृषि विज्ञान केंद्रां अर मुख्यालय रा 200 ऊं बत्ता अशैक्षणिक कर्मचारी सिरकत कर रह्या है। इण मांय कबड्डी, फुटबॉल, वॉलीबॉल, बास्केटबॉल, रस्साकशी, 100 मीटर दौड़, 200 मीटर दौड़, ऊंची अर लंबी कूद, भाला फेंक अर बैडमिंटन समेत न्यारी—न्यारी होड़ां राख्यी जा रही है।

000